

Kiender

Kiender vien ik niet veul an, 't spiet mi ' j, mar bedaankt

Kiender vien ik niet veul an, 't spiet mi ' j, mar bedaankt
d' Iene griemt de muren vol en de ere jaankt
d' Iene smiet mit lego links en rechts over de schoolders
Mar wat nog et minste is, bin die trotse oolders
Wat mi'j zwaor de keel uuthangt, bin die trotse oolders

Trotse oolders kuj' nooit tot een goed gesprek verleiden
midden in 't verhael dan kroepen zi'j op hanen en kni'jen
En zi'j neuzelen zolang' over kleurtien en de maat
van de inhoud van de luier, dat et op 'e maege slat

Lestweeks zundags sleup oons Jaantien deur tot kwat veur acht
't Is niet te geloven, dat is ni'js waor ik op waacht
Oonze Klaos eet niet zo veul, dat vienen wi'j niet gezond
Wil ie iene vreten zien, now kope dan een hond!

Kiender vien ik niet veul an, da's toch niet zo wild
a'k ien' op de aarm moet, slao ik al op tilt
Babyluiers stinken ok as de container koold is
Mar wat nog et minste is, bin die trotse oolders
Wat mi'j zwaor de keel uuthangt, bin die trotse oolders

Trotse oolders vien ik nog veul slimmer as die veule
pittbull-baosies die mi'j zeggen: hi'j wil allieënd mar speulen
Trotse oolders daar gao'j toch niet graeg naor op visite
of hej' nocht an sesamstraat en dat gesodemieter?

Och, zie es dat koegelronde boekien van oonz' Steven
Meenske fielseteerd heur, hebb' ik ok, kiek mar es even
Steven kan al pappe zeggen, is 't niet een genie?
Ik kiek Stevens moeke an en vraoge heur: tegen wie?

Kiender vien ik niet veul an, da's toch niet zo vremd
hej' ze op 'e schoot dan kotsen zi'j jow over 't hemd
En ze bin ok nooit zo lief as in die Hema-foolders
Mar wat nog et minste is, bin die trotse oolders
Waoj ' toch echt beroerd van wodden, bin die trotse oolders

Trotse oolders vaalt aj' 't goed bezien niet mit te praoten
inkeld dada, kielewiele, moej' een boertien laoten?
Trotse oolders kuj' ok al van wiethoevere roeken
mit heur irritante geurtien van die Zwitsal-doecken

Oonze Frits het gister krek zien eerste taantien kregen
Ja dat he'k ontdekt: hi'j het 'm an mien vinger regen
Frits is ondernemend, kiek dat mannegien es gaon
Dat he'k in de gaten, mar die vase laot ie staon!

Kiender vien ik niet veul an, 't spiet mi ' j, mar bedaankt
d' Iene kakt de luiers vol en de ere jaankt
Ik moet toleranter wezen, kan 'k ok wel perberen
't Lag vanzels al aandere as 't mien eigen jongen weren
't Lag mittien hiel aandere as 't mien eigen kiender weren

Slaop kientien slaop

tekst en meziek:
Jan Oosterhof